



大清文宗協天翊運執中垂謨懋德振武聖孝淵恭端仁寬敏
顯皇帝實錄卷之五十三

咸豐二年壬子二月壬午朔

上詣

壽康宮問

皇貴太妃安。○諭內閣。我朝景運延長。

列聖相承。均於登極之初。選建萬年吉地。朕紹登大寶。恪遵

成憲。於上年特派載銓。彭蘊章。基溥。前往

東陵相度。並諭令陸應穀。來京協同選擇。茲據該王大臣等。先

後奏稱。現於

東西兩陵。擇有吉壤數處。仍宜詳加勘度。以昭慎重。著派定郡王載銓。大學士裕誠。禮部尚書奕湘。總管內務府大臣署刑部侍郎基溥。工部侍郎彭蘊章。會同江西巡撫署刑部侍郎陸應穀。各帶諳習堪輿之人。敬謹覆看。繪圖呈覽。以定福基。用副朕纘承。

先緒。垂裕後昆至意。○兩江總督陸建瀛。江南河道總督楊以增。奏壩工過半。挑工將次全完。現仍加緊趕辦。冀早合龍。得旨。慎重趕辦。斷勿遲延。○以詹事府詹事俞長贊。充日講起居注官。翰林院侍講汪振基。編修龍元僖。署日講起居注官。○癸未。諭內閣。顏以燠。奏料塚被燒一摺。河工料塚。帑項攸

關。該管員弁。自應嚴加防守。近日南河有料塚被燒之案。而東河蘭儀廳料塚。竟至延燒六十餘塚之多。據該河督查明。尚無借端捏飾情弊。該管同知羅鈞亨。業經賠補全完。其失火係在該員赴省期內。姑從寬免其議處。蘭陽汛千總諸葛元。著摘去頂帶。仍責令該員弁等。會同地方官。嚴拏放火人犯。務獲究辦。以示懲儆。○又諭。陳慶偕奏。審擬京控命案一摺。此案山東鄆城縣捕役蕭德。與縣民于克敬。口角爭毆。將于克敬踢傷身死。膽敢棄屍井內。串通仵作。捏報傷痕。若非提省審辦。幾致正兇漏網。冤獄莫伸。前署鄆城縣知縣趙東曙。既失察差役毆斃人命。迨檢驗屍傷。又不細心辨視。致被

件作舞弊蒙混。僅予議處。不足示懲。趙東曙著交部嚴加議處。○甲申。

上詣

壽康宮問

皇貴太妃安。○遣官祭

文昌帝君廟。○遣官祭

先醫之神。○諭內閣。前據步軍統領衙門奏。已革湖南瀏陽縣縣丞王逢吉。遣抱呈控御史與外官通信請託等情。當降旨將給事中雷維翰解任。交刑部查訊。茲據該部奏稱。訊取雷維翰供詞。與王逢吉呈出原信。情節尚屬相符。惟雷鐸信

函。未經該給事中呈出。有無請託等弊。未得實據。王逢吉係雷維翰參劾之員。其藉端訐告。是否虛捏。希圖反噬。非確切查訊。不足折服其心。著交湖北巡撫龔裕。親提王逢吉全案人證卷宗。再行研訊。覈實定擬。並將湖南醴陵縣知縣雷鐸提案訊取確供具奏。並著湖廣總督程番。查明雷維翰所寄書函。有無請託。明白回奏。解任給事中雷維翰。著暫交都察院飭令聽候傳訊。尋奏。雷維翰所寄信函。並無請託。亦無雷鐸轉遞信函之事。王逢吉信任門丁婪贓舞弊等情。已由湖南撫臣駱秉章親訊確供。情真罪當。該革員。以雷維翰係參奏之人。虛捏反噬。情節顯然。報聞。○以

宣宗成皇帝梓宮奉安

山陵恭奉

神牌黃輿回京。免經過之宛平。良鄉。涿。房山。涇水。易。六州縣地方本年額賦。○乙酉。諭內閣。興業奏。回空漕船挂欠關稅。請飭催解一摺。上年回空各幫軍船。經過淮宿兩關。共未完正耗稅銀一萬六千三百九十兩零。著漕運總督。並兩江。湖廣。江蘇。安徽。浙江。江西。湖北。湖南。各督撫。轉飭各該糧道。按照每幫欠稅銀數。先於道庫籌墊解交該關。仍勒限催追各幫丁。繳還道庫。以免懸宕而重國課。○又諭。德興。奕興奏。查辦蒙古王旗地酌議章程。開單呈覽。據稱。奉天捕盜弁兵。責成

該管廳員認真考覈。該管府尹衙門。按年覈其獲犯多寡。以定功過去留。其滋事首犯王柏齡。易發增。吳保泰等。所種地畝。撤歸該王旗另行招佃。不准扣還押荒銀兩。其餘從犯暫免撤地。以觀後效等語。均著照所議辦理。其歷任辦理不善之廳員。著奉天府府尹查明據實分別叅奏。仍嚴定考覈章程。奏明遵辦。以除積習而收實效。○又諭。奕興奏。請將支借帶兵需用銀兩。由養廉銀內分年扣還等語。此次派兵查拏科爾沁旗抗租匪犯。借支盛京戶部銀六千五十一兩零。著准其作正開銷。毋庸在該將軍養廉內扣還。○引見各衙門保送京察一等人員。得旨。此次京察一等圈出人員。著各該

堂官再行出具切實考語。交吏部帶領引見。圈出之滿洲蒙古中書筆帖式等官。著歸入理事同知通判內。遇有缺出。與舊記名人員一體帶領引見。漢軍漢人。著交部以撫民同知通判等官分別選用。戶部員外郎宗室靈杰。起居注主事文光。太常寺寺丞文光。侍衛處主事興福。步軍統領衙門主事瑞禧。上諭處委署主事舒璧。大常寺贊禮郎特克什布。覺羅景蘭。國子監助教清恩。鴻臚寺鳴贊裕通。慶存。欽天監博士陳希齡。俱著交部照例以應升之缺升用。所有內閣侍讀麟泰等二百六十二員。俱著准其一等加一級。

上以祭

社稷壇。自是日始齋戒三日。○丙戌。諭內閣。朕於本月二十日啟鑾後。著派順承郡王春山。大學士卓秉恬。尚書禧恩。吉倫泰。都統祿普。留京辦事。○以候補總兵官長壽。為甘肅涼州鎮總兵官。○丁亥。祭

先師孔子。遣協辦大學士杜受田行禮。○諭內閣。自本月二十四日起。至三月初一日止。所有御營隨從之王公大臣官員等。俱著穿青長袍褂。冠綴纓緯。○又諭。此次京察引見年。至六十五歲以上之宗人府副理事官宗室瑞本。戶部筆帖式哲春。兵部郎中覺羅慶長。刑部筆帖式麟書。工部郎中奎齡。工部筆帖式盧銘璋。理藩院司務伊昌阿。太常寺博士繩

格。欽天監五官正忠福。崇文門宣課司副使胡嗣超。均著以原品休致。餘著照舊供職。○山東巡撫陳慶偕因病解任。調河南巡撫李德為山東巡撫。未到任前。以布政使劉源灝暫署。以廣東布政使柏貴為河南巡撫。雲南按察使崇綸為廣東布政使。安徽甯池太廣道張印塘為雲南按察使。○戊子。祭。

大社。

大稷。

上親詣行禮。○

孝淑睿皇后忌辰。遣官祭。

昌陵。○詣。

壽康宮。問。

皇貴太妃安。○以勦捕福建臺灣洋盜出力。予同知孔昭慈等加銜升敘有差。○己丑。遣官祭。

關帝廟。○諭內閣。兆那蘇圖奏。叅革知縣具稟訴辯。請旨交審一摺。山西已革太原縣知縣王倬。於被叅革職後。輒赴該撫衙門稟訴該管上司揭叅不公。經該藩司傳訊各情。全無憑據。供詞仍復狡展。叅員許告上司。此風斷不可長。若仍令該上司覆訊。轉得藉口逞刁。希圖抱累。著王慶雲。聯英。於查辦鹽務回省時。將該革員就近提訊。務得確情。按律定擬具

奏○河南南陽鎮總兵官圖塔布因病解任調四川川北鎮
總兵官伊薩布為河南南陽鎮總兵官○庚寅諭內閣○三月
初七日恭奉

宣宗成皇帝升祔

奉先殿前殿禮成後著惠親王綿愉恭請

宣宗成皇帝神牌恭親王奕訢恭請

孝穆成皇后神牌惇郡王奕誼恭請

孝慎成皇后神牌成郡王載銳恭請

孝全成皇后神牌奉安

奉先殿後殿東室○命兵部右侍郎春佑三等侍衛麟興二等

侍衛西拉布恭詣

西陵查看紅椿○辛卯

上詣

壽康宮問

皇貴太妃安○遣官祭

歷代帝王廟○陝甘總督舒興阿奏署漢中鎮總兵官祥瑞
未能潔己率屬不洽兵情現調省察看另派員接署得旨查
明有何項劣蹟即行據實奏參又奏甘肅省防緝番匪情形
批辦理尚為妥速此等番案宜嚴斷不宜寬○修築浙江西
防廳埧卸石塘從巡撫常大澂請也○壬辰

孝康章皇后忌辰遣官祭

孝陵○

上詣

壽康宮問

皇貴太妃安○引見內務府三院等處京察保送一等人員得旨此次內務府三院等處京察一等圈出人員著各該堂官再行出具切實考語帶領引見圈出之堂主事廣恩內管領嵩瓚掌儀司贊禮郎文泰堂筆帖式承裕祿安恆俊世祥常榮福長會計司筆帖式福祿掌儀司筆帖式廣智管理三旗銀兩莊頭處筆帖式廷瑞掌關防管理內管領事務處筆帖

式保慶上駟院筆帖式海斌武備院六品虛銜委署庫掌常德武備院筆帖式廣裕松林圓明園主事世榮圓明園六品庫掌貴寶靜宜園六品苑丞寶純俱著交吏部記名照例選用所有一等官員筆帖式達他等員俱著准其一等加一級至年已逾歲之御藥房主事吉瑞堂筆帖式明福慎刑司筆帖式志恆圓明園八品苑副倭克金年力就衰均著以原品休致○以戶部左侍郎德興署兼管錢法堂事務○癸巳

上詣

壽康宮問

皇貴太妃安○

孝德皇后殯宮月祭遣官行禮。○遣官祭黑龍潭

昭靈沛澤龍王之神。玉泉山

惠濟慈佑靈護龍王之神。昆明湖

安佑普濟沛澤廣生龍王之神。密雲縣白龍潭

昭靈廣濟普澤龍王之神。○遣官祭圓明園

惠濟祠。

河神廟。○諭內閣。陸建瀛。楊文定奏。籌補災缺兵糧。循案碾

動倉穀。並改放折色一摺。著照所請。所有上年江淮各屬災

缺。咸豐二年省倉旗營。綠營暨漕河等標營兵糧。共一萬六

千四百餘石。內漕河各標營。本年應需兵米六千四百餘石。

除將江都等縣徵存米一千一百餘石。儘數抵撥外。其不敷

米五千二百石。准其動碾鹽城等州縣常平倉穀抵補。其災

缺省倉兵匠等米一萬石。著仍照上年成案。並按照市價。酌

減改放折色。旗營每石折給銀一兩四錢。綠營每石折給銀

一兩。於司庫正項內動支給發。事竣造冊報銷。○諭軍機大

臣等。有人奏。安徽鳳陽。潁毫等屬。民情强悍。常拔刀游蕩。名

為曳刀手。壽州漢回。尤多不睦。私造刀槍擡槍。每因口角細

故。各糾集匪徒數百人。約期互毆。以致匪徒乘機搶掠等語。

漢回尋釁互鬪。最為閭閻之害。該地方官。若不隨時懲戒。必

致釀成巨患。雲南永昌之案。可為前鑒。著陸建瀛。蔣文慶。嚴

飭各屬於所轄地方力行保甲。剴切曉諭。並嚴禁私造兵器。以期弭患未萌。儻頑梗不化。報復相尋。立即查拏。按律懲辦。毋稍姑息。原摺著鈔給閱看。將此各諭令知之。○復引見京察一等圈出人員。得旨。宗室存誠。著交軍機處記名。遇有應升缺出題奏。其餘各員。除龍元僖。孫晉墀。金鶴清。陳宗元。杜學禮。徐資乾。覺羅奎齡。桂清。李維醇。祿勳。和色布。麒慶。恩錫。慧誠。梁同新。全善。無庸記名外。麟泰。清盛。許誦恆。蔡宗茂。蔣元溥。王履謙。張衍重。袁泳錫。劉書年。崇恩。熙麟。世焜。紹德。恩保。董醇。錫祉。齡椿。英毓。保成。劉重昭。孔繁洙。明緒。恩齡。多山。吳廷棟。李清鳳。文發。多瑞。奎文。明昆。賽沙布。福昌。周炳鑑。厲

恩官。俱著交軍機處記名。以道府用。烏勒洪額。著記名。以關差道府用。○命協辦大學士直隸總督訥爾經額。在紫禁城騎馬。○修福建臺灣廠協標中右營戰船。從巡撫王懿德請也。○甲午遣官祭昭忠祠。○諭內閣。昨據恆春奏。刑部擬補題缺主事。與侍郎書元意見不同。當降旨。交書元明白回奏。茲據奏稱。刑部主事題缺。專將一等筆帖式題升。而以候補人員專補選缺。與各部院衙門揀補章程不符等語。刑部題補主事。該尚書侍郎各執己見。究應如何辦理。以昭公允。著派載銓。會同吏部。查覈例案。據實具奏。至刑部向來擬補章程。並現出主事一缺。該堂官等意見。與恆春書元孰同孰異。

著周祖培。呂賢基。陸應穀。各自具摺陳奏。尋刑部尚書周祖培等奏。主事題缺。應將一等筆帖式題升。均與恆春意見相同。命定郡王載銓。會同吏部查奏。尋議以書元固執已見。越次撓補。恆春未能執中果斷。均屬不合。得旨。書元。恆春著交部分別議處。○諭軍機大臣等。廣東凌十八股匪。自困守羅鏡墟以後。經該督徐廣縉督兵圍剿。將全隊奔逃之吳三等匪。斬擒殆盡。該督於十二月初十日。進駐信宜縣城。就近督兵攻圍。並嚴斷接濟。自不難剋日殲除。惟自正月十八日接該督奏報後。又將一月。未得續報。朕心甚為焦盼。此股匪首凌十八。係著名會匪。與洪秀泉等同惡相濟。現在賽尚阿親

抵永安城外。督兵環攻。逆匪勢日窮蹙。若凌十八一股。刻即剿除。該督乘勝前赴永安。合力圍攻。更易得手。且可堵截逆匪逃竄之路。著徐廣縉嚴飭帶兵員弁。將凌十八股匪迅速殲滅。毋任窮寇苟延。一有捷音。該督即行馳奏。並督帶官弁兵勇。與賽尚阿會合。迅奏膚功。以慰廑念。將此由四百里諭令知之。○復引見內務府三院等處京察一等。圈出人員。得旨。各員內。除文勳。廣恩。銘海。景紱。毓清。明秀。寶齡。積慶。誠明。毋庸記名外。明善。興保。文熊。恆祺。文謙。明新。福瑞。義泰。師曾。恆起。俱著交軍機處記名。○鑾儀衛鑾儀使蔣柏齡。因病解任。以甘肅甯夏鎮總兵官武慶。為鑾儀衛鑾儀使。福建長福

營參將全慶為甘肅甯夏鎮總兵官。○乙未以戶部尚書禧恩請假。改派都察院左都御史花沙納留京辦事。並署步軍統領。○丙申清明節。

上詣

奉先殿

壽皇殿行禮。○遣官祭

永陵。

福陵。

昭陵。

昭西陵。

孝陵。

孝東陵。

景陵。

泰陵。

泰東陵。

裕陵。

昌陵。○遣官祭

孝和睿皇后暫安寢殿。○遣官祭

宣宗成皇帝暫安寢殿。○遣官祭

孝穆成皇后

孝慎成皇后

孝全成皇后陵寢。○遣官祭

孝德皇后殯宮。○遣官祭

端慧皇太子園寢。○御乾清門聽政。○諭內閣德春奏。遵查樹株情形。開單呈覽一摺。

慕陵

寶山上下一帶東西砂山。及

龍鳳門至元寶山等處。查有回乾樹一百十三株。著德春於今歲冬間。敬謹補種。至枝葉未能暢茂各樹株。務即督率各員勤加澆灌。以期一律蕃滋。其有乾枯情形者。一併妥為培養。

並著於秋冬之際。再行詳細查看。據實奏聞。○漕運總督楊殿邦奏。新漕首進過淮日期。並運河水勢枯澀情形。得旨。實力辦理。不准推諉。汝與河臣。必須事事和衷。勿得稍分彼此。又奏。催漕出力員弁。請擇尤酌保。批。著照所請行。必須尤為出力者酌保數員。毋許冒濫。○以光祿寺卿勝保。詹事府少詹事朱蘭。為內閣學士。兼禮部侍郎銜。

大清文宗協天翊運執中垂謨懋德振武聖孝淵恭端仁寬敏
顯皇帝實錄卷之五十三

